

Date – 14/07/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

AKASHVANI AIZAWL

- 1. Central YMA chuan Special Intensive Revision (SIR) 2026 draft roll-a mihring pun nasat lutukna hmunte en tha leh turin ECI ah kalchilhin an thlen dawn.
- 2. Manipur-a Kuki leh Naga-te inkara inhmuhthiam lohna thleng mekah Mizorama kohhran hruaituten palai hna thawh an rel.
- 3. Strait of Hormuz-a India lawng pahnih beih an ni chu India chuan na takin a dem
- 4. FIFA World Cup Semifinal ah inkhel hmasa zawkah zanin dar 12.30 hian France leh Spain an inkhel dawn



CYMA SIR

Central YMA chuan Special Intensive Revision (SIR) 2026 draft roll-a mihring pun nasat lutukna hmunte en tha leh turin thuneitute an ngen dawn a; ECI lam pawh kalchilhin an thlen dawn.

Vawiin khan Central YMA chuan an Committee Room-ah thuthar thehdarhtute an kawm a; Central YMA hruaitute chuan SIR 2026 Draft Electoral Roll tihchhuah kha ngun takin an zir chiang a, Constituency thenkhatah SIR neih hnueh kum 2005-a Roll-a awmzat leh mihring pundan nena chhutin Enumeration Form thunluh (Digitisation) ah hian thil ni thei lo a awm nia an hriat thu leh, Mapping chungchangah hian dik hlel deuha thil tih a awm nia an hriat thu an sawi a, hemi chungchang hi thuneitute hnenah en tha leh tura ngenna thlen an tum thu an sawi.

Central YMA president Pu R Lalngheta chuan, SIR 2026 draft roll atanga a lan danin khawthlang lam ramri hnaih constituency-ah mihring an pung nasa lutuk chu an ngaih a that loh thu sawiin, entha leh tura thuneitute ngen an tum thu leh ECI ah pawh lamkal intirin a hmunah an zuk kalchilh dawn thu a sawi a; voter pun tam zualna hmuna SIR buaipuitu zingah thawk tha tawk lo an awm nia an hriat thu a sawi bawk.

Central YMA hruaitute chuan roll a la awm ngailote tana inthun luh dilna hun hawn mekah leh hearing neih hunah pawh khua leh tui dik takte chauh an luh theih nan hearing kal pui turin ERO leh AERO te an ngen a; hearing ah hian YMA Branch-te leh NGO dangte pawh thahnemngai taka tel turin an ngen bakah, Political Party-te pawh ngaihtuahna dang hmang lo turin an ngen nghal a ni.

(CORR Johnny)

<><><>

SLAUGHTER HOUSE

AH&Vety department hnuai sa talhna - Slaughter House pahnihah chawhrualin thla tin ran 600 vel talh ziah ang a ni a; bawng talh an tam ber.

Vawiin khan State Veterinary Polyclinic Hospital Conference Hall, Khatlaah AH&Vety department leh ICAR-NMRI, Hyderabad tangkawp chuan sa talhtute tan thianghlim taka sa talh dan leh man man zawka hralh theih dan inzirtirna "One day training on Hygenic meat production, meat safety and value addition technologies for Development of North-Eastern India" an buatsaih a; veterinary officer Dr Michael V Lalrinzuala chuan Aizawl khawpuia Slaughter House 2-ah thla tin ran 600 vel talh thin a nih thu a sawi.

AH&Vety department Dr Michael V Lalrinzuala chuan Mualpuiah leh Bawngkawn Brigade-ah Slaughter House an neih thu a sawi a, slaughter house hmang tur hian sa talhtute chu an inziah luh a tul thu sawiin, tunah hian Mualpuiah sa talhtu mi 48 leh Brigrade ah mi 6 an inziak lut a, ni tin ran 20 vel bakah Inrinnia zawrh turin Zirtawpni zanah ran 80 vel talh a ni thin, a ti a; bawng talh tam berin, sial leh lawi pawh an talh thin thu leh vawk erawh chu an talh meuh loh thu a sawi.

Ran talhtu inziaklut turte chu TB an vei leh vei loh endik thin a nih thu leh TB vei lote chiah ziah luh theih a nih thu te, rante pawh an hriselna dinhmun endikin, a hrisel lo deuhthe chu Tuiriala sa leh a kaihnawih bik bawlhhlawh paihna hmunah an paih thin thute a sawi bawk.

Training-ah hian Aizawla sa zuar leh ran talhtu mi 20 an tel a ni.

(CORR JOHNNY)

<><><>

MANIPUR

Manipur-a Kuki leh Naga-te inkara inhmuhthiam lohna thleng mekah kohhran hruaituten inremna a awm theih nan hma an la dawn.

Vawiin khan Mizoram Kohhran Hruaitute Committee (MKHC) leh Nagaland Joint Christian Forum (NJCF) chuan Manipur-a Kuki leh Naga-te inkarah inremna a awm theih nan hmalakho an rel a ni.

Akashvani News Aizawl zawhna chhangin MKHC hrulaitute chuan, Manipur-a Kuki leh Naga-te inkarah inremna a awm theih nana hma la turin Manipur leh Nagaland atangin ngenna an dawn thu an sawi a; ngenna an dawn angin vawiin khan Manipur leh Nagaland atangin kohhran hrulaitute nen an inkawm thu leh neutral taka Mizoram leh Nagaland atanga kohhran hrulaituten a tul anga hmalak an rel thu an sawi a; hmalak dan tur chu la ngaihtuah leh tur a nih thu an sawi bawk.

(CORR-Johnny)

<><><>

SAITUAL ASF

Tunlai hian Saitual district thenawm leh Saitual Town chhungah vawk pul hri African Swine Fever (ASF) a leng mek a. Saitual District chhungah ASF hri hi a darh zel loh nan District Magistrate chuan vawk khuahkhirhna thuchhuah a siam nghal a ni.

Saitual Dist ah hian April thla avang khan ASF vangin vawk 101 a thi tawh ni a chhinchhiaah a ni a, July thla bikah hian 43 an thi a, vawk 29 suat a ni tawh a ni.

<><><>

TAWIPUI SOUTH LANDSLIDE

Lunglei leh Lawngtlai inkar, Lunglei lam atangaTawipui South khaw tawntirh a leimin chu vawiin lamah theih ang ang in buaipui mahse thenfai ngaihna a awm rih lo a, kawng a ping rih.

Vawiin khan Lunglei atangin DC ruahman na in Lunglei BDO leh NDRF te bakah Assistant Controller of Mines te an kal a, ram neitu te nen leivung paihna tur te inremna an siam nghal a ni. Kawngmin in In 3 a hnawl te hi Assam Type vek a ni a, a ruhrel nen a hnawl vek a ni.

Lunglei Dist DM&R Co ordinator Pi Chawngdingpuui chuan leimin titlang tur hian hma lak mai theih a nih loh thu sawiin naktukah hma an la ang, a ti a ni.

Hetihlai hian Khualzin tangkhang engemawzat chu pumpelh kawngah ke a kalin inbanlet tir an ni a. Motor chi hrang hrang Lawngtlai lam atanga Lunglei lam pan thahnem tak leimin hian a dang a, tukin khan Tawipui South YMA te chuan tangkhang te hi chaw ei an siam sak a, zanriah pawh an siamsak leh ang. Riahna tur pawh a remchan dan in ruahman a ni a, helai kawng hi ABCI enkawl a ni.

<><><>

MSU

Mizo Students’ Union (MSU) chuan zirtirtu mi 550, Samagra hnuai atangin mi 246, zaa 44.73 mahni post-a awmlo an awm thu an sawi.

Vawiin khan MSU hruaitute hian Education Minister Dr. Vanlalhlana a pisa ah hmuin zirtirtu mahni post-a awm lo te leh zirtirtu nungchang tha lo te chungchang an thlen a. Zirtirtu mahni post a awmlo chuan sikul tam takah zirtirtu indaihlohna thlenin naupang zirna thlengin a nghawng thu an sawi.

Tun dinhmunah, Mamit district-ah zirtirtu mahni awmna hmun a awmlo mi 150 lai an awm thu an thlen bawk a ni.

Education ministerchuan MSU hruaitute thil thlen chu a ngaih pawimawh takzet thu leh hmalak a nih tur thu a lo hrilh niin MSU chuan an sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PMKVY 4.0

Sorkar laipui Ministry of Skill Development & Entrepreneurship PMKVY 4.0 kaltlanga Mizoram State Special Project hnuaiah nikum 2025 khan Mizo thalaite kut themthiamna zirtirna (skill development) ah thalai 2,584-in training an zo.

Labour, Employment, Skill Development & Entrepreneurship (LESDE) department atanga Akashvani News Aizawl thudawn danin, PMKVY 4.0 hnuaiah Mizoram sorkara sum hmuh cheng vbc 1 leh nuai 96 sengin kum 2025 chung khan kut themthiamna chi hrang 11-ah thalaite an training a, Mizo thalai 10,220-te kut themthiamna zirtirna tura a duan Mizoram State Special Project atan hian Ministry of Skill Development & Entrepreneurship chuan PMKVY 4.0 hnuaiah cheng vbc 31.06 a ruahman a; he project hnuaiah hian training tura inziaklut thalai 4,454 zinga 2,584-in an training chhuak a ni.

Mizoram State Special Project kalpuitu LESDE department hotute chuan, Mizoram State Special Project kaltlang hian thalai 2,584 chu kut themthiamna lam hna chi hrang hrang 11 zirtir an nih thu an sawi a; training senso atan sorkar laipui atangin cheng vbc 2.47 hmuh a ni a, hemi atang hian cheng vbc 1 nuai 96 hman niin, project hi zawh a ni tawh, an ti.

((VOICE CAST - Thalaiten kut themthiamna hna an zir hrang hrangte chu - Baking Technician/Operative, Nail Technician, Electrician, Physical Education Assistant (Primary Years), Beauty Therapist, Housekeeping, Professional Makeup Artist, Geriatric Caregiver (Institutional & Home Care), Electrical Technician, Emergency Medical Technician-Basic, Food & Beverage Service - Associate, Fitness Trainer, Data Entry Operator" (Divyangjan), Craft Baker, Mobile Phone Hardware Repair Technician, Processed Food Entrepreneur leh Plumber General-te a ni a; training chhuak mi 2,584-te hnenah hian certificate pek vek an ni))

(Corr Johnny)

<><><>

STRAIT OF HORMUZ

Strait of Hormuz-a India lawng pahnih beih an ni chu India chuan na takin a dem. MT Al Bahiyah leh MT Mombasa lawng chu vawiin khan Strait of Hormuz-ah hian beih an ni a. He thilthleng avang hian Iran Embassy-a Deputy Chief of Mission chu External Affairs Ministry chuan vawiin khan a ko nghal a. Iran palai hnenah hian thil thleng an dem thu sawrkar hotute chuan an hrilh a ni. Lawng pahnihah hian thawktu mi 46 awmin an zinga 30 chu India mi an ni a. Mi pakhat a thih bakah midang engemawzatin hliam an tuar bawk a ni.

(Newsonair)

<><><>

FIFA WC 26

FIFA World Cup Semifinal ah inkhel hmasa zawkah zanin dar 12.30 hian France leh Spain an inkhel dawn. Texas-a Dallas Stadium-a inkhel turah hian France hi an chak chuan a zawnin FIFA World Cup final a zawnin tum thum an lut thei dawn a. Hetihlai hian Spain lam hian kum 2010-a an champion hnua World Cup final luh leh hmasak ber thlen an tum dawn a. France hian Morocco 2-0 a hnehin Semifinal an lut a ni.

(Newsonair)

<><><>